

COMUNICATO n. 862 del 19/04/2024

Traduzione in mòcheno

Euregio zuazol ver de suach, u'ganommen de zòmpint ver 1,3 milionen va euro

[Mòcheno] U'ganommen va de Provinzaljunta, no de vourtschbinn van asesor en birtschòft untersuach, suach ont òrbet, der zòmpint zbischn der GECT Euregio Tirol-Südtirol-Trentin, de Autonome Provinz va Trea't, de Autonome Provinz va Poazn ont der Land Tirol ver de zòmmòrbet van drai lender ver en vinfte bando van Euregiogèlt ver de Untersuach (ESF).

Ver en asesor der unterstitz, s bòcksen ont s baitergem va de untersuach ont van vernaiern sai' bichtega plinder ver en enviregea' van mentschkapital ont van bèrknsistemen aa. En spil sai' de qualitet ont de kompetitivitet van gònze provinzallònt. Ver dòs de Provinz billt versterchern der international plòtz van Trentin en raom va de untersuach ont van vernaiern turch naikaitn van Euregio aa. S mossnem hòt za tea' pet en enviregea' van òrbetn as gèlt kriang turch en GECT Euregio en raom va de gruntundersuach; finz hait sai' zuazolt kemmen viar bandi van ESF, pet de beiln as u'pfònk kemmen 23 interregionalprojektn ver ungefer 8,5 milionen va euro en gònzn. De u'ganommen projektn en paitrog ver de jarder 2025/2027 barn meing 1,3 milionen prauchen ausgem va de inser Provinz sait en jor as kimm, asou abia as der president va de Autonome Provinz va Trea't unterstrichen hòt.

Der GECT Euregio hòt zbischn sai'na riven der sèll za mòchen reklam ont versterchern de koordiniarde òrbet va bissnschòftundersuach, turch naikaitn as enteressiarn untersuacher va òlla drai de lender van Euregio, Tirol, Sudtirol ont Trentin. Ver dòs vour ungefer 10 jor de Junta van GECT hòt u'ganommen der ESF (Euregio Science Fund), as hòt abia rif der sèll za unterstitzn interregionalprojektn va international bichtegkait en raom va de gruntundersuach en temen as en òlla enteressiarn. Pet de doi sicht men sicht vour za unterschraim an Oa'negea' va zòmmòrbet zbischn der GECT ont de regiarn van drai lender ver bandi as regelmèsseg ausgea'. Pet en mossnem va hait kimm u'ganommen der model van doi Oa'negea' va zòmmòrbet ont derlap der president va de Provinz za tea' nen unterschraim ont za hòlten au gèlt avn provinzalbilanz ver za zoln zua sèll as noat ist ver de projektn.

De koordiniarung va de regi ont van òrbetn u'gahenk en vinfte bando van ESF kimm gem en an earstn moment en Land Tirol ont lai der moment va bèrtn van projektvourtschbinnen bart zòmm gamòcht kemmen pet de hilf van Osterraicherzuazol ver de bissnschòft (FWF), òrbet ver de beil s mossnem va hait u'ganommen hòt as an iats lònt 86.666,67 euro en GECT Euregio gem miast.

Men mu òndra nochrichtn en de doi sait vinnen:

<https://www.fwf.ac.at/en/funding/portfolio/international-collaborations/tyrol-south-tyrol-trentino>

Ibersetz gamòcht van Sprochtirl va de Tolgamoaschòft Hoa Valzegu' ont Bersntol

(cdt)

